

# Govor višeg zamjenika visokog predstavnika, Larry Butlera povodom održavanja četvrte skupštine Udruženja bankara BiH

Dame i gospodo,

Zadovoljstvo mi je biti ovdje s vama, posebno zbog toga što rezultati koji su nedavno ostvareni u vašem sektoru opravdavaju optimizam u pogledu budućnosti bh. ekonomije u cijelini, i to iz dva razloga:

- Prvo, snažan poslovni rast koji ostvarujete reflektira pozitivnu krivulju cijelokupne ekonomije
- i drugo, vaš trenutni uspjeh vam daje instrumente za zadržavanje tog pozitivnog rasta.

Rast bankarskog sektora je funkcija, ali i preduslov ekonomskog rasta.

Vrijednost depozita u bankama BiH je sa 6,9 milijardi KM u 2004. godini povećana na 8,8 milijardi KM u prošloj godini. To je značajno povećanje od 27,5 %.

Tokom istog perioda vrijednost kredita povećana je sa 5,5 milijardi KM na malo više od 7 milijardi KM, što pokazuje da je došlo do znatnog porasta povjerenja koje javnost ima u bankovni sistem i same banke. U tom smislu uvjeren sam da je bankovni sektor u BiH ispred nekih susjednih zemalja.

Nedavno sam i javno morao skrenuti pažnju na jedan zabrinjavajući trend koji je prisutan među političkim liderima. Čini mi se da su neki političari zaključili da kriza s kojom se BiH suočava već prošla. Ekonomija doživljava rast,

pregovori s Evropskom unijom su u toku, sektor javnih financija je sada jači zbog uspješnog funkcioniranja PDV sistema. Međutim, ova poboljšanja su ipak skromna i moramo skrenuti pažnju političarima da sada apsolutno nije pravo vrijeme za «poigravanje» s napretkom koji je postignut na putu BiH ka boljoj evropskoj budućnosti, bez obzira kako veliko bilo iskušenje da se to pokuša učiniti u periodu predizborne kampanje.

Svi znate, a nadam se da i javnost postaje toga svjesna, da su poduzeti potrebni koraci na uspostavi modernog sistema supervizije banka u BiH, u skladu s modernim evropskim standardima i pod okriljem Centralne banke.

Na taj način će se deponentima osigurati dodatna zaštita, a poboljšanje sigurnosti bankarskog sistema i dalji rast kredita će pomoći u privlačenju investicija i zapošljavanju. Uspostava sistema supervizije banaka je takođe jedan od uslova iz Sporazuma o stabilizaciji i pridruživanju.

To je pozitivno i građani BiH moraju osjetiti te pozitivne efekte.

Zbog toga je izuzetno važno za BiH i sve njene građane da u sljedećih nekoliko sedmica entitetski Parlamenti hitno usvoje potrebne sporazume za uspostavu modernog i efikasnog sistema supervizije banaka.

Ukoliko to sada urade, sistem će biti uspostavljen i započeti s radom prije oktobarskih izbora.

Postojanje dva regulatora banaka je postalo nepotrebno i kontraproduktivno zbog činjenice da je međuentitetsko bankarstvo postalo norma. Održavanje odvojenih organizacija je skupo i neefikasno, a troškovi će biti sve veći u periodu kada u narednim godinama BiH započne poštivati Direktive EU u oblasti bankarstva. To će zahtijevati postojanje posebne ekspertize koja će biti skuplja ukoliko je budu pružale dvije a ne jedna organizacija.

Apeliram na Udruženje bankara da nastavi lobirati za što skorije donošenje odluke u Parlamentu kako bi ogroman napredak koji je ostvaren u bankarskom sektoru bio konsolidiran i dodatno unaprijeđen, tako da građani i njihova ušteđevina mogu biti zaštićeni, kao i da se osiguraju daljnja ulaganja u zapošljavanje i bh. privredu.

Hvala.